

I. DISPOSICIONES XERAIS

XEFATURA DO ESTADO

4284 *Lei 7/2014, do 21 de abril, pola que se modifica a Lei 12/2002, do 23 de maio, pola que se aproba o concerto económico coa Comunidade Autónoma do País Vasco.*

JUAN CARLOS I

REI DE ESPAÑA

Saiban todos os que a viren e a entenderen que as Cortes Xerais aprobaron e eu sanciono a seguinte lei:

EXPOSICIÓN DE MOTIVOS

O vixente concerto económico coa Comunidade Autónoma do País Vasco, aprobado pola Lei 12/2002, do 23 de maio, prevé na súa disposición adicional segunda que, no caso de se producir unha reforma no ordenamento xurídico tributario do Estado que afecte a concertación dos tributos, se dar unha alteración na distribución das competencias normativas que afecte o ámbito da imposición indirecta ou se crearen novas figuras tributarias ou pagamentos á conta, ambas as administracións procederán, de común acordo e polo mesmo procedemento seguido para a súa aprobación, á pertinente adaptación do concerto económico ás modificacións que experimentase o referido ordenamento.

A Lei 28/2007, do 25 de outubro, pola que se modifica a Lei 12/2002, do 23 de maio, pola que se aproba o concerto económico coa Comunidade Autónoma do País Vasco, adecuou esta norma ás novidades introducidas no ordenamento xurídico tributario do Estado no período 2002-2007.

Desde a citada modificación do concerto, acordada na Comisión Mixta de Concerto Económico do 30 de xullo de 2007, producíronse outras novidades no ordenamento tributario que fan necesaria a adecuación do concerto, tal e como exige a súa disposición adicional segunda.

En primeiro lugar, concértanse os tributos de titularidade estatal creados nos últimos anos. É o caso do imposto sobre actividades de xogo, contido na Lei 13/2011, do 27 de maio, de regulación do xogo, o imposto sobre o valor da produción da enerxía eléctrica, o imposto sobre a produción de combustible nuclear gastado e residuos radioactivos resultantes da xeración de enerxía nucleoelectrónica e o imposto sobre o almacenamento de combustible nuclear gastado e residuos radioactivos en instalacións centralizadas, introducidos pola Lei 15/2012, do 27 de decembro, de medidas fiscais para a sustentabilidade enerxética, o imposto sobre os depósitos nas entidades de crédito, regulado no artigo 19 da Lei 16/2012, do 27 de decembro, pola cal se adoptan diversas medidas tributarias dirixidas á consolidación das finanzas públicas e ao impulso da actividade económica e, máis recentemente, o imposto sobre os gases fluorados de efecto invernadoiro, establecido pola Lei 16/2013, do 29 de outubro, pola cal se establecen determinadas medidas en materia de fiscalidade ambiental e se adoptan outras medidas tributarias e financeiras.

Igualmente, precísase a competencia para exixir a retención do gravame especial sobre premios de lotarías, creado pola Lei 16/2012, do 27 de decembro, pola cal se adoptan diversas medidas tributarias dirixidas á consolidación das finanzas públicas e ao impulso da actividade económica, gravame que foi reproducido pola normativa tributaria foral.

A última novidade destacable do sistema tributario estatal a que se debe adaptar o concerto é a substitución do imposto sobre as vendas retalistas de determinados hidrocarburos por un tipo autonómico do imposto sobre hidrocarburos, levada a cabo pola Lei 2/2012, do 29 de xuño, de orzamentos xerais do Estado para o ano 2012.

Ademais da adaptación do concerto ás últimas reformas do sistema tributario, incorpóranse algunhas melloras técnicas e sistemáticas no seu texto. É o caso das adaptacións nos puntos de conexión do imposto sobre a renda de non residentes e a fixación dunha regra de competencia na xestión e inspección deste imposto en relación coas rendas obtidas a través de establecemento permanente.

A este mesmo propósito de mellora técnica responden a inclusión na concertación do imposto sobre sucesións e doazóns dun punto de conexión para as doazóns de dereitos sobre inmobles, e as adaptacións no procedemento de cambio de domicilio fiscal e na presentación de certas declaracións informativas.

Tamén se inclúen modificacións de aspectos institucionais do concerto. Así, axilízase a remisión á Xunta Arbitral das consultas tributarias sobre as cales non se alcanzase acordo na Comisión de Coordinación e Avaliación Normativa e elimínase a prohibición de designar durante un novo mandato os membros da Xunta Arbitral. Por último, incorpórase unha previsión sobre o exercicio de competencias en caso de conflitos formulados ante a Xunta, que estaba contida ata agora só no ámbito regulamentario.

Por iso, na sesión da Comisión Mixta do Concerto Económico 1/2014, celebrada en Madrid o 16 de xaneiro de 2014, ambas as administracións adoptaron de común acordo a modificación do concerto económico, de acordo co mesmo procedemento seguido para a súa aprobación.

Artigo único. Modificación da Lei 12/2002, do 23 de maio, pola que se aproba o Concerto Económico coa Comunidade Autónoma do País Vasco.

Apróbase a modificación do concerto económico coa Comunidade Autónoma do País Vasco, aprobado pola Lei 12/2002, do 23 de maio, nos termos establecidos no anexo desta lei.

Disposición derradeira única. Entrada en vigor.

Un. A presente lei entrará en vigor o día seguinte ao da súa publicación no «Boletín Oficial del Estado».

Dous. Os tributos concertados en virtude da modificación do concerto económico que incorpora a presente lei enténdense concertados con efectos desde o 1 de xaneiro de 2013.

Por tanto, mando a todos os españois, particulares e autoridades, que cumpran e fagan cumprir esta lei.

Madrid, 21 de abril de 2014.

JUAN CARLOS R.

O presidente do Goberno,
MARIANO RAJOY BREY

ANEXO**Acordo**

Aprobar a modificación do concerto económico coa Comunidade Autónoma do País Vasco, convindo na nova redacción que se deben dar aos artigos un, dez, vinte e dous, vinte e cinco, trinta e tres, trinta e catro, trinta e seis, trinta e sete, corenta e tres, corenta e seis, sesenta e catro, sesenta e cinco e sesenta e seis, na adición dos artigos vinte e tres bis, vinte e tres ter, vinte e tres quáter, vinte e tres quinquies, as disposicións transitorias décimo primeira, décimo segunda e décimo terceira e na supresión da disposición adicional quinta e a disposición transitoria sexta.

«Artigo 1. *Competencias das institucións dos territorios históricos.*

Un. As institucións competentes dos territorios históricos poderán manter, establecer e regular, dentro do seu territorio, o seu réxime tributario.

Dous. A exacción, xestión, liquidación, inspección, revisión e recadación dos tributos que integran o sistema tributario dos territorios históricos corresponderalles ás respectivas deputacións forais.

Tres. Para a xestión, inspección, revisión e recadación dos tributos concertados, as institucións competentes dos territorios históricos terán as mesmas facultades e prerrogativas que ten recoñecidas a Facenda pública do Estado.»

«Artigo 10. *Retencións e ingresos á conta por determinadas ganancias patrimoniais.*

Un. As retencións relativas ás ganancias patrimoniais derivadas da transmisión ou reembolso de accións e participacións de institucións de investimento colectivo exixiraas, conforme a súa respectiva normativa, a Administración do Estado ou a deputación foral competente por razón do territorio, segundo que o accionista ou partícipe teña a súa residencia habitual ou domicilio fiscal en territorio común ou vasco.

Dous. As retencións correspondentes ao gravame especial sobre os premios de determinadas lotarías e apostas exixiraas, conforme a súa respectiva normativa, a Administración do Estado ou a deputación foral competente por razón do territorio, segundo que o seu perceptor teña a súa residencia habitual ou domicilio fiscal en territorio común ou vasco.

As retencións e ingresos á conta correspondentes a premios distintos dos especificados no parágrafo anterior que se entreguen como consecuencia da participación en xogos, concursos, rifas ou combinacións aleatorias, estean ou non vinculados á oferta, promoción ou venda de determinados bens, produtos ou servizos, exixiraas, conforme a súa respectiva normativa, a Administración do Estado ou a deputación foral competente por razón do territorio, segundo que o pagador destes teña a súa residencia habitual ou domicilio fiscal en territorio común ou vasco.

Na exacción das retencións e ingresos á conta a que se refire este punto, as deputacións forais aplicarán idénticos tipos aos de territorio común.»

«Artigo 22. *Exacción do imposto.*

Un. Cando se graven rendas obtidas mediante establecemento permanente, a exacción do imposto corresponderalle a unha ou outra Administración ou a ambas conxuntamente, nos termos especificados no artigo 15 anterior.

Dous. Cando se graven rendas obtidas sen mediación de establecemento permanente, a exacción do imposto corresponderalle á deputación foral competente por razón do territorio, cando as rendas se entendan obtidas ou producidas no País Vasco por aplicación dos seguintes criterios:

a) Os rendementos de explotacións económicas, cando as actividades se realicen en territorio vasco.

b) Os rendementos derivados de prestacións de servizos, tales como a realización de estudos, proxectos, asistencia técnica, apoio á xestión, así como de servizos profesionais, cando a prestación se realice ou se utilice en territorio vasco. Entenderanse utilizadas en territorio vasco as prestacións que sirvan a actividades empresariais ou profesionais realizadas en territorio vasco ou se refiran a bens situados neste.

Atenderase ao lugar da utilización do servizo cando este non coincida co da súa realización.

c) Os rendementos que deriven, directa ou indirectamente, do traballo:

a') Cando proveñan dunha actividade persoal desenvolvida no País Vasco.

b') As pensións e demais prestacións similares, cando deriven dun emprego prestado en territorio vasco.

c') As retribucións que se perciban pola condición de administradores e membros dos consellos de administración, das xuntas que fagan as súas veces ou de órganos representativos en toda clase de entidades, conforme o previsto no punto catro deste artigo.

d) Os rendementos derivados, directa ou indirectamente, da actuación persoal en territorio vasco de artistas ou deportistas ou de calquera outra actividade relacionada coa dita actuación, mesmo cando sexan percibidos por persoa ou entidade distinta do artista ou deportista.

e) Os dividendos e outros rendementos derivados da participación en fondos propios de entidades públicas vascas, así como os derivados da participación en fondos propios de entidades privadas na contía prevista no punto catro deste artigo.

f) Os xuros, canons e outros rendementos do capital mobiliario:

a') Satisfeitos por persoas físicas con residencia habitual no País Vasco ou entidades públicas vascas, así como os satisfeitos por entidades privadas ou establecementos permanentes na contía prevista na epígrafe catro deste artigo.

b') Cando retribúan prestacións de capital utilizadas en territorio vasco.

Cando estes criterios non coincidan, atenderase ao lugar de utilización do capital cuxa prestación se retribúe.

g) Os rendementos derivados, directa ou indirectamente, de bens inmoables situados en territorio vasco ou de dereitos relativos a estes.

h) As rendas imputadas aos contribuíntes persoas físicas titulares de bens inmoables urbanos situados en territorio vasco.

i) As ganancias patrimoniais derivadas de valores emitidos por persoas ou entidades públicas vascas, así como as derivadas de valores emitidos por entidades privadas na contía prevista no punto catro deste artigo.

j) As ganancias patrimoniais derivadas de bens inmoables situados en territorio vasco ou de dereitos que se deban cumprir ou se exerzan no dito territorio.

En particular, considéranse incluídas nesta epígrafe:

a') As ganancias patrimoniais derivadas de dereitos ou participacións nunha entidade, residente ou non, cuxo activo estea constituído, principalmente, por bens inmoables situados en territorio vasco.

b') As ganancias patrimoniais derivadas da transmisión de dereitos ou participacións nunha entidade, residente ou non, que lle atribúan ao seu titular o dereito de gozo sobre bens inmobles situados en territorio vasco.

k) As ganancias patrimoniais derivadas doutros bens mobles situados en territorio vasco ou de dereitos que se deban cumprir ou se exerzan no dito territorio.

Tres. Cando, de acordo cos criterios sinalados no punto anterior, unha renda se puiden entender obtida simultaneamente en ambos os territorios, a súa exacción corresponderalles aos territorios históricos cando o pagador, se é persoa física, teña a súa residencia habitual no País Vasco; se for persoa xurídica ou establecemento permanente, atenderase ao disposto no punto catro deste artigo.

Catro. Nos supostos a que se refiren a letra c') da epígrafe c) e as letras e), f) e i) do punto dous anterior, así como no suposto previsto no punto tres, as rendas satisfeitas por entidades privadas ou establecementos permanentes entenderanse obtidas ou producidas en territorio vasco na contía seguinte:

a) Cando se trate de entidades ou establecementos permanentes que tributen exclusivamente ao País Vasco a totalidade das rendas que satisfagan.

b) Cando se trate de entidades ou establecementos permanentes que tributen conxuntamente a ambas as administracións a parte das rendas que satisfagan, en proporción ao volume de operacións realizado no País Vasco.

Non obstante, nos supostos a que se refire esta letra, a Administración competente para a exacción da totalidade dos rendementos será a do territorio onde teñan a súa residencia habitual ou domicilio fiscal as persoas, entidades ou establecementos permanentes que presenten a liquidación en representación do non residente, sen prexuízo da compensación que proceda practicar á outra Administración pola parte correspondente á proporción do volume de operacións realizado no territorio desta última.

Así mesmo, as devolucións que proceda practicar aos non residentes serán a cargo da Administración do territorio onde teñan a súa residencia habitual ou domicilio fiscal as persoas, entidades ou establecementos permanentes que presenten a liquidación en representación do non residente, sen prexuízo da compensación que proceda practicar á outra Administración pola parte correspondente ao volume de operacións da entidade pagadora realizado no territorio desta última.

Cinco. O gravame especial sobre bens inmobles de entidades non residentes corresponderalle á deputación foral competente por razón do territorio, cando o ben inmueble estea situado en territorio vasco.»

«Artigo 23 bis. *Xestión e inspección do imposto cando se graven rendas obtidas mediante establecemento permanente.*

Un. Cando se graven rendas obtidas mediante establecemento permanente, nos casos de tributación a ambas as administracións, aplicaranse as regras de xestión do imposto previstas no artigo 18 anterior.

Dous. A inspección do imposto, cando se graven rendas obtidas mediante establecemento permanente, será realizada pola Administración que resulte competente, que aplicará as regras previstas no artigo 19 anterior.»

«Sección 4.^a bis. *Imposto sobre os depósitos nas entidades de crédito*

Artigo 23 ter. *Normativa aplicable e exacción do imposto.*

Un. O imposto sobre os depósitos nas entidades de crédito é un tributo concertado que se rexerá polas mesmas normas substantivas e formais establecidas en cada momento polo Estado.

Non obstante o anterior, as institucións competentes dos territorios históricos poderán establecer os tipos de gravame deste imposto dentro dos límites e nas condicións vixentes en cada momento en territorio común.

Así mesmo, as institucións competentes dos territorios históricos poderán aprobar os modelos de declaración e ingreso que conterán, ao menos, os mesmos datos que os do territorio común, e sinalar prazos de ingreso para cada período de liquidación, que non diferirán substancialmente dos establecidos pola Administración do Estado.

Dous. A exacción do imposto corresponderalle á Administración do Estado ou á deputación foral competente por razón do territorio, segundo que a sede central ou sucursais onde se manteñan os fondos de terceiros estean situadas en territorio común ou vasco.

Tres. Os pagamentos á conta do imposto serán exixidos por unha ou outra Administración conforme o criterio contido no punto anterior.»

«Sección 4.ª ter. Imposto sobre o valor da produción da enerxía eléctrica

Artigo 23 quáter. *Normativa aplicable e exacción do imposto.*

Un. O imposto sobre o valor da produción da enerxía eléctrica é un tributo concertado que se rexerá polas mesmas normas substantivas e formais establecidas en cada momento polo Estado.

Non obstante, as institucións competentes dos territorios históricos poderán aprobar os modelos de declaración e ingreso que conterán, ao menos, os mesmos datos que os do territorio común, e sinalar prazos de ingreso para cada período de liquidación, que non diferirán substancialmente dos establecidos pola Administración do Estado.

Dous. A exacción do imposto corresponderalle á Administración do Estado ou á deputación foral competente por razón do territorio segundo que as instalacións de produción de enerxía eléctrica radiquen en territorio común ou vasco.

Tres. Os pagamentos á conta do imposto serán exixidos por unha ou outra Administración, conforme o criterio contido no punto dous anterior.

Catro. As devolucións que procedan serán efectuadas polas respectivas administracións na contía que a cada unha corresponda.»

«Sección 4.ª quáter. Imposto sobre a produción de combustible nuclear gastado e residuos radioactivos resultantes da xeración de enerxía nucleoelectrica e imposto sobre o almacenamento de combustible nuclear gastado e residuos radioactivos en instalacións centralizadas

Artigo 23 quinquies. *Normativa aplicable e exacción dos impostos.*

Un. O imposto sobre a produción de combustible nuclear gastado e residuos radioactivos resultantes da xeración de enerxía nucleoelectrica e o imposto sobre o almacenamento de combustible nuclear gastado e residuos radioactivos en instalacións centralizadas son tributos concertados que se rexerán polas mesmas normas substantivas e formais establecidas en cada momento polo Estado.

Non obstante, as institucións competentes dos territorios históricos poderán aprobar os modelos de declaración e ingreso que conterán, ao menos, os mesmos datos que os do territorio común, e sinalar prazos de ingreso para cada período de liquidación, que non diferirán substancialmente dos establecidos pola Administración do Estado.

Dous. A exacción do imposto sobre a produción de combustible nuclear gastado e residuos radioactivos resultantes da xeración de enerxía nucleoelectrica corresponderalle á Administración do Estado ou á deputación foral competente por razón do territorio, segundo que as instalacións onde se produza o combustible

nuclear gastado e os residuos radioactivos resultantes da xeración de enerxía nucleoelectrónica radiquen en territorio común ou vasco.

Tres. A exacción do imposto sobre o almacenamento de combustible nuclear gastado e residuos radioactivos en instalacións centralizadas corresponderalle á Administración do Estado ou á deputación foral competente por razón do territorio, segundo que as instalacións onde se almacene o combustible e os residuos radiquen en territorio común ou vasco.

Catro. Os pagamentos á conta destes impostos serán exixidos por unha ou outra Administración, conforme os criterios contidos nos puntos dous e tres anteriores.»

«Artigo 25. *Normativa aplicable e exacción do imposto.*

Un. O imposto sobre sucesións e doazóns é un tributo concertado de normativa autónoma.

Corresponderalle a súa exacción á deputación foral competente por razón do territorio nos seguintes casos:

a) Nas adquisicións «mortis causa» e as cantidades percibidas polos beneficiarios de seguros sobre a vida para caso de falecemento, cando o causante teña a súa residencia habitual no País Vasco na data da devindicación.

b) Nas doazóns de bens inmobles e dereitos sobre estes, cando os ditos bens radiquen en territorio vasco.

Para efectos do previsto nesta letra, terán a consideración de doazóns de bens inmobles as transmisións a título gratuito dos valores a que se refire o artigo 108 da Lei 24/1988, do 28 de xullo, do mercado de valores.

c) Nas doazóns dos demais bens e dereitos, cando o donatario teña a súa residencia habitual no País Vasco na data da devindicación.

d) No suposto en que o contribuínte teña a súa residencia no estranxeiro, cando a totalidade dos bens ou dereitos estean situados, se poidan exercer ou se deban cumprir en territorio vasco, así como pola percepción de cantidades derivadas de contratos de seguros sobre a vida, cando o contrato fose realizado con entidades aseguradoras residentes no territorio vasco ou tivese lugar no País Vasco con entidades estranxeiras que operen nel.

Dous. Nos supostos recollidos nas letras a) e c) do punto anterior, as deputacións forais aplicarán as normas de territorio común cando o causante ou donatario adquirise a residencia no País Vasco con menos de 5 anos de antelación á data da devindicación do imposto. Esta norma non será aplicable aos que conservasen a condición política de vascos de acordo co artigo 7.º 2 do Estatuto de autonomía.

Tres. Cando nun documento un mesmo doante doase a favor dun mesmo donatario bens ou dereitos e, por aplicación dos criterios especificados no punto un anterior, o rendemento se deba entender producido en territorio común e vasco, corresponderalle a cada un deles a cota que resulte de aplicar ao valor dos doados, cuxo rendemento se lle atribúe, o tipo medio que, segundo as súas normas, correspondería ao valor da totalidade dos transmitidos.

Catro. Cando proceda acumular doazóns, corresponderalle ao País Vasco a cota que resulte de aplicar ao valor dos bens e dereitos actualmente transmitidos, o tipo medio que, segundo as súas normas, correspondería ao valor da totalidade dos acumulados.

Para estes efectos, entenderase por totalidade dos bens e dereitos acumulados os procedentes de doazóns anteriores e os que son obxecto da transmisión actual.»

«Artigo 33. *Normativa aplicable e exacción dos impostos.*

Un. Os impostos especiais teñen o carácter de tributos concertados que se rexerán polas mesmas normas substantivas e formais establecidas en cada momento polo Estado.

Non obstante o anterior, as institucións competentes dos territorios históricos poderán establecer os tipos de gravame destes impostos dentro dos límites e nas condicións vixentes en cada momento en territorio común.

Así mesmo, as institucións competentes dos territorios históricos poderán aprobar os modelos de declaración e ingreso, que conterán ao menos os mesmos datos que os de territorio común, e sinalar prazos de ingreso para cada período de liquidación que non diferirán substancialmente dos establecidos pola Administración do Estado.

Dous. Os impostos especiais de fabricación serán exixidos polas respectivas deputacións forais cando a súa devindicación se produza no País Vasco.

As devolucións dos impostos especiais de fabricación serán efectuadas pola Administración en que tivesen sido ingresadas as cotas cuxa devolución se solicita. Non obstante, nos casos en que non sexa posible determinar en que Administración foron ingresadas as cotas, a devolución será efectuada pola Administración correspondente ao territorio onde se xere o dereito á devolución. O control dos establecementos situados no País Vasco, así como a súa autorización, en calquera dos seus réximes, será realizado polas respectivas deputacións forais, non obstante isto, será necesaria a comunicación previa á Administración do Estado e á Comisión de Coordinación e Avaliación Normativa.

Tres. O imposto especial sobre determinados medios de transporte será exixido polas respectivas deputacións forais cando os medios de transporte sexan obxecto de matriculación definitiva en territorio vasco.

Non obstante o disposto no punto un, as institucións competentes dos territorios históricos poderán incrementar os tipos de gravame ata un máximo do 15 por cento dos tipos establecidos en cada momento polo Estado.

A matriculación efectuarase conforme os criterios establecidos pola normativa vixente sobre a materia. En particular, as persoas físicas efectuarán a matriculación do medio de transporte na provincia en que se encontre a súa residencia habitual.

Catro. O imposto especial sobre o carbón será exixido polas respectivas deputacións forais cando a súa devindicación se produza no País Vasco.

Considerarase producida a devindicación no momento da posta a consumo ou autoconsumo.

Enténdese producida a posta a consumo no momento da primeira venda ou entrega de carbón tras a produción, extracción, importación ou adquisición intracomunitaria.

Terán, así mesmo, a consideración de primeira venda ou entrega as vendas ou entregas subseguintes que realicen os empresarios que destinen o carbón á súa revenda cando lles sexa aplicable na adquisición a exención por destino a revenda.

Terá a consideración de autoconsumo a utilización ou consumo do carbón realizado polos produtores ou extractores, importadores, adquirentes intracomunitarios ou empresarios a que se refire o parágrafo anterior.»

«Sección 11.^a *Imposto sobre os gases fluorados de efecto invernadoiro*

Artigo 34. *Normativa aplicable e exacción do imposto.*

Un. O imposto sobre os gases fluorados de efecto invernadoiro é un tributo concertado que se rexerá polas mesmas normas substantivas e formais que as establecidas en cada momento polo Estado.

Non obstante, as institucións competentes dos territorios históricos poderán aprobar os modelos de declaración e ingreso, que conterán ao menos os mesmos

datos que os de territorio común, e sinalar prazos de ingreso para cada período de liquidación, que non diferirán substancialmente dos establecidos pola Administración do Estado.

Dous. A exacción do imposto corresponderalle á Administración do Estado ou á deputación competente por razón do territorio cando os consumidores finais a que se refire a normativa estatal utilicen os produtos obxecto do imposto en instalacións, equipamentos ou aparellos radicados en territorio común ou vasco.

Cando os gases fluorados de efecto invernadoiro sexan obxecto de autoconsumo, a exacción do imposto corresponderalle á Administración do Estado ou á deputación competente por razón do territorio onde este se produza.

No resto de supostos non recollidos nos parágrafos anteriores, a exacción corresponderalle á Administración onde radique o establecemento do contribuínte en que se produza o feito impositivo.

Tres. A devolución que proceda será efectuada pola Administración en que fose ingresada a cota cuxa devolución se solicita co límite do dito importe.»

«Artigo 36. *Imposto sobre actividades de xogo.*

Un. O imposto sobre actividades de xogo é un tributo concertado que se rexerá polas mesmas normas substantivas e formais que as establecidas en cada momento polo Estado.

En todo caso, os suxeitos pasivos do imposto incorporarán nos modelos que se presentarán ante cada unha das administracións implicadas a totalidade da información correspondente ás actividades gravadas por este imposto.

Non obstante o anterior, respecto das actividades que sexan exercidas por operadores, por organizadores ou polos que desenvolvan a actividade gravada por este imposto con residencia fiscal no País Vasco, as institucións competentes dos territorios históricos poderán elevar os tipos do imposto ata un máximo do 20 por cento dos tipos establecidos en cada momento polo Estado. Este incremento aplicarase, exclusivamente, sobre a parte proporcional da base impositiva correspondente á participación no xogo dos residentes fiscais en territorio vasco.

Así mesmo, as institucións competentes dos territorios históricos poderán aprobar os modelos de declaración e ingreso que conterán, ao menos, os mesmos datos que os do territorio común, e sinalar prazos de ingreso para cada período de liquidación, que non diferirán substancialmente dos establecidos pola Administración do Estado.

Dous. Os suxeitos pasivos tributarán, calquera que sexa o lugar en que teñan o seu domicilio fiscal, ás deputacións forais, á Administración do Estado ou a ambas as administracións en proporción ao volume de operacións realizado en cada territorio durante o exercicio.

A proporción do volume de operacións realizada en cada territorio durante o exercicio determinarase en función do peso relativo das cantidades xogadas correspondentes a xogadores residentes no País Vasco e en territorio común. Esta proporción aplicarase tamén ás cotas liquidadas derivadas de modalidades de xogo en que non se poida identificar a residencia do xogador e ás cotas correspondentes a xogadores non residentes en territorio español.

Non obstante o disposto no parágrafo anterior, a exacción do imposto derivada da realización de apostas mutuas deportivo-benéficas e apostas mutuas hípcas estatais, en que non se identifique a residencia do xogador, corresponderalle á Administración do Estado ou á deputación foral competente por razón do territorio, segundo que o punto de venda onde se realice a aposta se localice en territorio común ou vasco.

Tres. Os suxeitos pasivos presentarán as declaracións-liquidacións do imposto ante as administracións competentes para a súa exacción, en que constarán, en todo caso, a proporción aplicable e as cotas que resulten ante cada unha das administracións.

Catro. As devolucións que procedan serán efectuadas polas respectivas administracións na contía que a cada unha lle corresponda.

Cinco. A inspección dos suxeitos pasivos será levada a cabo polos órganos da Administración onde radique o domicilio fiscal do suxeito pasivo ou do seu representante no caso de suxeitos pasivos non residentes, sen prexuízo da colaboración do resto de administracións tributarias concernidas, e producirá efectos fronte a todas as administracións competentes, incluíndo a proporción de tributación que corresponda a estas.

Non obstante, corresponderalle á Administración do Estado a inspección dos suxeitos pasivos, cuxo domicilio fiscal radique en territorio vasco, cando no ano anterior o importe agregado das cantidades xogadas excedese 7 millóns de euros e a proporción destas, realizada en territorio común, de acordo cos puntos de conexión especificados no punto dous anterior, sexa igual ou superior ao 75 por 100.

Así mesmo, corresponderalles aos órganos da deputación competente por razón do territorio a inspección dos suxeitos pasivos, cuxo domicilio fiscal radique en territorio común, cando no ano anterior o importe agregado das cantidades xogadas excedese 7 millóns de euros e realízense, de acordo cos puntos de conexión especificados no punto dous anterior, a totalidade das súas operacións en territorio vasco.

Se como consecuencia das ditas actuacións resulta unha débeda para ingresar ou unha cantidade para devolver que corresponda a ambas as administracións, o cobramento ou o pagamento correspondente será efectuado pola Administración actuante, sen prexuízo das compensacións que entre aquelas procedan.

Os órganos da inspección competente comunicaranlle os resultados das súas actuacións ao resto das administracións afectadas.

O establecido nos parágrafos anteriores deste punto entenderase sen prexuízo das facultades que lles corresponden ás administracións tributarias no ámbito dos seus respectivos territorios en materia de comprobación e investigación, sen que as súas actuacións poidan ter efectos económicos fronte aos contribuíntes en relación coas liquidacións definitivas practicadas como consecuencia de actuacións dos órganos das administracións competentes.

As proporcións fixadas nas comprobacións pola Administración competente producirán efectos fronte ao suxeito pasivo en relación coas obrigas liquidadas, sen prexuízo das que, con posterioridade ás ditas comprobacións, se acorden con carácter definitivo entre as administracións competentes.»

«Artigo 37. *Outros tributos sobre o xogo.*

Un. O resto dos tributos que recaen sobre o xogo teñen o carácter de tributos concertados de normativa autónoma cando a súa autorización se deba realizar no País Vasco. Aplicarase a mesma normativa que a establecida en cada momento polo Estado no que se refire ao feito impositivo e suxeito pasivo.

Dous. A taxa sobre os xogos de sorte, envite ou azar será exaccionada pola deputación foral competente por razón do territorio, cando o feito impositivo se realice no País Vasco.

Tres. A taxa fiscal sobre rifas, tómbolas, apostas e combinacións aleatorias será exaccionada pola deputación foral competente por razón de territorio, cando a súa autorización se deba realizar no País Vasco.»

«Artigo 43. *Residencia habitual e domicilio fiscal.*

Un. Para efectos do disposto no presente concerto económico, enténdese que as persoas físicas residentes teñen a súa residencia habitual no País Vasco aplicando sucesivamente as seguintes regras:

Primeira. Cando permanezan no dito territorio un maior número de días do período impositivo, no imposto sobre a renda das persoas físicas; do ano inmediato

anterior, contado de data a data, que finalice o día anterior ao de devindicación, no imposto sobre sucesións e doazóns, no imposto sobre transmisións patrimoniais e actos xurídicos documentados, e no imposto especial sobre determinados medios de transporte.

No resto de tributos, a residencia habitual das persoas físicas será a mesma que corresponda para o imposto sobre a renda das persoas físicas na data da devindicación daquelas.

Para determinar o período de permanencia computaranse as ausencias temporais.

Salvo proba en contrario, considerarase que unha persoa física permanece no País Vasco cando radique na súa vivenda habitual.

Segunda. Cando teñan neste o seu principal centro de intereses, considerándose como tal o territorio onde obteñan a maior parte da base imponible do imposto sobre a renda das persoas físicas; para estes efectos, exclúiranse as rendas e ganancias patrimoniais derivadas do capital mobiliario, así como as bases imputadas no réxime de transparencia fiscal, excepto o profesional.

Terceira. Cando sexa este o territorio da súa última residencia declarada para efectos do imposto sobre a renda das persoas físicas.

Dous. As persoas físicas residentes en territorio español, que non permanezan no dito territorio máis de cento oitenta e tres días durante o ano natural, consideraranse residentes no territorio do País Vasco, cando neste radique o núcleo principal ou a base das súas actividades empresariais ou profesionais ou dos seus intereses económicos.

Tres. Cando se presuma que unha persoa física é residente en territorio español, por teren a súa residencia habitual no País Vasco o seu cónxuxe non separado legalmente e os fillos menores de idade que dependan daquel, considerarase que ten a súa residencia habitual no País Vasco.

Catro. Para os efectos deste concerto económico, entenderanse domiciliados fiscalmente no País Vasco:

- a) As persoas físicas que teñan a súa residencia habitual no País Vasco.
- b) As persoas xurídicas e demais entidades sometidas ao imposto sobre sociedades que teñan no País Vasco o seu domicilio social, sempre que neste estea efectivamente centralizada a súa xestión administrativa e a dirección dos seus negocios. Noutro caso, cando se realice no País Vasco a dita xestión ou dirección.

Nos supostos en que non se poida establecer o lugar do domicilio de acordo con estes criterios, atenderase ao lugar onde radique o maior valor do seu inmovilizado.

- c) Os establecementos permanentes cando a súa xestión administrativa ou a dirección dos seus negocios se efectúe no País Vasco. Nos supostos en que non se poida establecer o lugar do domicilio de acordo con este criterio, atenderase ao lugar onde radique o maior valor do seu inmovilizado.

- d) As sociedades civís e os entes sen personalidade xurídica, cando a súa xestión e dirección se efectúe no País Vasco. Se con este criterio for imposible determinar o seu domicilio fiscal, atenderase ao territorio onde radique o maior valor do seu inmovilizado.

Cinco. Os suxeitos pasivos do imposto sobre sociedades, así como os establecementos permanentes de entidades non residentes, virán obrigados a comunicar a ambas as administracións os cambios de domicilio fiscal que orixinen modificacións na competencia para exixir este imposto. No imposto sobre a renda das persoas físicas, a comunicación entenderase producida pola presentación da declaración do imposto.

Seis. As discrepancias entre administracións que se poidan producir respecto da domiciliación dos contribuíntes serán resoltas, logo de audiencia destes, pola xunta arbitral que se regula na sección 3.^a do capítulo III deste concerto económico.

Sete. As persoas físicas residentes en territorio común ou foral que pasen a ter a súa residencia habitual dun ao outro cumprarán as súas obrigas tributarias de acordo coa nova residencia, cando esta actúe como punto de conexión, a partir dese momento.

Ademais, cando, en virtude do previsto neste punto, se deba considerar que non existiu cambio de residencia, as persoas físicas deberán presentar as declaracións complementarias que correspondan, con inclusión dos xuros de demora.

Non producirán efecto os cambios de residencia que teñan por obxecto principal lograr unha menor tributación efectiva.

Presumirase, salvo que a nova residencia se prolongue de maneira continuada durante, ao menos, tres anos, que non existiu cambio en relación co imposto sobre a renda das persoas físicas e o imposto sobre o patrimonio, cando concorran as seguintes circunstancias:

a) Que no ano no cal se produce o cambio de residencia ou no seguinte, a base imponible do imposto sobre a renda das persoas físicas sexa superior en, ao menos, un 50 por 100 á do ano anterior ao cambio. No caso de tributación conxunta determinarase de acordo coas normas de individualización.

b) Que no ano no cal se produza a dita situación, a tributación efectiva polo imposto sobre a renda das persoas físicas sexa inferior á que correspondese de acordo coa normativa aplicable do territorio de residencia anterior ao cambio.

c) Que no ano seguinte a aquel no cal se produce a situación a que se refire a letra a) ou no seguinte volva ter a residencia habitual no dito territorio.

Oito. Presumirase, salvo proba en contrario, que non se produciu cambio de domicilio fiscal das persoas xurídicas cando no ano anterior ou seguinte ao dito cambio devesen inactivas ou cesen na súa actividade.

Nove. O cambio de domicilio do contribuínte poderao promover calquera das administracións implicadas. A dita Administración dará traslado da súa proposta, cos antecedentes necesarios, á outra para que se pronuncie no prazo de catro meses sobre o cambio de domicilio e a data a que se retrotraen os efectos. Se esta responde confirmando a proposta, a Administración que resulte competente comunicarllo ao contribuínte.

Se non houber conformidade, poderase continuar o procedemento na forma prevista no punto seis deste artigo.

Con carácter previo á remisión dunha proposta de cambio de domicilio, a Administración interesada poderá levar a cabo, en colaboración coa outra Administración, actuacións de verificación censual do domicilio fiscal.

Cando se produza un cambio de oficio de domicilio, logo de acordo de ambas as administracións, ou como consecuencia dunha resolución da Xunta Arbitral, presumirase, salvo proba en contrario, que o novo domicilio fiscal así determinado se manterá durante os tres anos seguintes á data de resolución.»

«Artigo 46. *Obrigas de información.*

Un. Os resumos das retencións e ingresos á conta practicados deberanse presentar, de acordo coa súa respectiva normativa, na Administración competente para a exacción das retencións e ingresos á conta que se deban incluír nestes.

As entidades que sexan depositarias ou xestionen o cobramento de rendas de valores que, de acordo coa normativa correspondente, veñan obrigadas á presentación dos resumos anuais de retencións e ingresos á conta deberán presentar estes de acordo coa súa respectiva normativa, ante a Administración á

cal corresponda a competencia para a comprobación e investigación das ditas entidades.

As entidades que sexan suxeitos pasivos do imposto sobre sociedades exixible polo Estado e as deputacións forais deberán presentar resumos anuais de retencións e ingresos á conta correspondentes aos rendementos a que se refiren os artigos 7.un.c), 9.un.primeira.a) e 23.dous deste concerto económico, conforme as normas sobre lugar, forma e prazo de presentación de declaracións que estableza cada unha das administracións competentes para a súa exacción, incluíndo o total dos rendementos e das retencións correspondentes a estes na declaración presentada a cada unha delas.

Dous. As declaracións que teñan por obxecto dar cumprimento ás distintas obrigas de fornecemento xeral de información tributaria legalmente exixidas deberán presentarse, de acordo coa súa respectiva normativa, ante a Administración do Estado ou ante a deputación foral competente por razón do territorio, de acordo cos seguintes criterios:

a) Tratándose de obrigados tributarios que desenvolvan actividades económicas, ante a Administración a que corresponda a competencia para a comprobación e investigación das ditas actividades empresariais ou profesionais.

b) Tratándose de obrigados tributarios que non desenvolvan actividades económicas, segundo que estean domiciliados fiscalmente en territorio común ou foral.

Para os efectos do disposto nas letras anteriores, cando se trate de herdanzas xacentes, comunidades de bens ou outras entidades carentes de personalidade xurídica, as referidas declaracións deberán presentarse, así mesmo, perante a Administración en que estean domiciliados fiscalmente os seus membros ou partícipes.

Tres. As declaracións de carácter censual deberán presentarse, de acordo coa súa respectiva normativa, ante a Administración en que radique o domicilio fiscal da persoa ou entidade obrigada a efectualas e, ademais, perante a Administración en que a dita persoa ou entidade deba presentar, conforme as regras previstas no presente concerto económico, algunha das seguintes declaracións:

Declaración de retencións e ingresos á conta.

Declaración-liquidación polo imposto sobre sociedades.

Declaración-liquidación polo imposto sobre o valor engadido.

Declaración polo imposto sobre actividades económicas.»

«Artigo 64. *Funcións.*

A Comisión de Coordinación e Avaliación Normativa terá atribuídas as seguintes funcións:

a) Avaliar a adecuación da normativa tributaria ao concerto económico con carácter previo á súa publicación.

Para estes efectos, cando, como consecuencia do intercambio de proxectos de disposicións normativas especificado no punto un do artigo 4 do presente concerto económico, se efectuasen observacións en relación coas propostas contidas nelas, calquera das institucións e administracións representadas poderá solicitar, por escrito e de forma motivada, a convocatoria desta comisión, que se reunirá no prazo máximo de quince días desde a solicitude de convocatoria, analizará a adecuación da normativa proposta ao concerto económico e intentará, con anterioridade á publicación das correspondentes normas, propiciar que as institucións e administracións representadas alcancen un acordo sobre as posibles discrepancias existentes en relación co contido da normativa tributaria.

b) Resolver as consultas que se presenten sobre a aplicación dos puntos de conexión contidos neste concerto económico. Estas consultas trasladaranse para a súa análise xunto coa súa proposta de resolución, no prazo de dous meses desde a súa recepción ao resto das administracións concernidas. No caso de que no prazo de dous meses non se formularsen observacións sobre a proposta de resolución, esta entenderase aprobada.

De existiren observacións e non seren admitidas, poderase chegar a un acordo sobre elas no seo da Comisión de Coordinación e Avaliación Normativa. En todo caso, transcorridos dous meses desde que as ditas observacións fosen formuladas sen chegar a un acordo sobre elas, a Comisión de Coordinación e Avaliación Normativa, así como calquera das administracións concernidas, poderá proceder a trasladar o desacordo á xunta arbitral no prazo dun mes.

c) Realizar os estudos que consideren procedentes para unha adecuada articulación estrutural e funcional do réxime autonómico co marco fiscal estatal.

d) Facilitarlles ás administracións competentes criterios de actuación uniforme, plans e programas de informática e articular os instrumentos, medios, procedementos ou métodos para a materialización efectiva do principio de colaboración e do intercambio de información.

e) Analizar os supostos ou cuestións que se formulen en materia de inspección entre a Administración do Estado e as respectivas deputacións forais, así como os problemas de valoración para efectos tributarios.

f) Emitir os informes que soliciten o Ministerio de Facenda, os distintos departamentos de facenda do Goberno Vasco e das deputacións forais e a Xunta Arbitral.

g) Calquera outra relacionada coa aplicación e a execución deste concerto económico en particular.»

«Artigo 65. *Composición.*

Un. A Xunta Arbitral estará integrada por tres membros cuxo nomeamento formalizarán o ministro de Facenda e Administracións Públicas e o conselleiro de Facenda e Finanzas.

Dous. Os árbitros serán nomeados para un período de seis anos.

Tres. En caso de se producir unha vacante, será cuberta seguindo o mesmo procedemento de nomeamento.

O novo membro será nomeado polo período de mandato que restaba ao que substitúe.

Catro. Os integrantes da xunta arbitral serán designados entre expertos de recoñecido prestixio con máis de quince anos de exercicio profesional en materia tributaria ou facendística.»

«Artigo 66. *Funcións.*

Un. A xunta arbitral terá atribuídas as seguintes funcións:

a) Resolver os conflitos que se formulen entre a Administración do Estado e as deputacións forais ou entre estas e a Administración de calquera outra comunidade autónoma, en relación coa aplicación dos puntos de conexión dos tributos concertados e a determinación da proporción correspondente a cada Administración nos supostos de tributación conxunta polo imposto sobre sociedades ou polo imposto sobre o valor engadido.

b) Coñecer dos conflitos que xurdan entre as administracións interesadas como consecuencia da interpretación e aplicación deste concerto económico a casos concretos concernentes a relacións tributarias individuais.

c) Resolver as discrepancias que se poidan producir respecto da domiciliación dos contribuíntes.

Dous. Cando se suscite o conflito de competencias, as administracións afectadas notificaránllelo aos interesados, o que determinará a interrupción da prescrición e a abstención de calquera actuación ulterior.

Os conflitos serán resoltos polo procedemento que regulamentariamente se estableza e nel darase audiencia aos interesados.

Tres. Cando se suscite o conflito de competencias, mentres sexa resolto este, a Administración que viñese gravando os contribuíntes en cuestión continuará someténdooos á súa competencia, sen prexuízo das rectificacións e compensacións tributarias que se deban efectuar entre as administracións, retrotraídas á data desde a que proceda exercer o novo foro tributario, segundo o acordo da Xunta Arbitral.»

«Disposición transitoria décimo primeira.

O réxime transitorio dos novos tributos concertados con efectos desde o 1 de xaneiro de 2013 axustarase ás regras seguintes:

Primeira. Os territorios históricos subrogáranse nos dereitos e obrigas, en materia tributaria, da Facenda pública estatal, en relación coa xestión, inspección, revisión e recadación dos tributos a que se refire esta disposición.

Segunda. As cantidades liquidadas e contraídas con anterioridade ao 1 de xaneiro de 2013 correspondentes a situacións que estivesen suxeitas ao País Vasco, de teren estado concertados os tributos a que se refire a presente disposición, e que se ingresen con posterioridade ao 1 de xaneiro de 2013, corresponderán na súa integridade ás deputacións forais.

Terceira. As cantidades devindicadas con anterioridade ao 1 de xaneiro de 2013 e liquidadas a partir desa data en virtude de actuacións inspectoras, distribuiranse aplicando os criterios e puntos de conexión dos tributos a que se refire a presente disposición.

Cuarta. Cando proceda, as devolucións correspondentes a liquidacións practicadas, ou que se deban practicar, con anterioridade ao 1 de xaneiro de 2013, serán realizadas pola Administración que fose competente na data da devindicación, conforme os criterios e os puntos de conexión dos tributos a que se refire a presente disposición.

Quinta. Os actos administrativos ditados polas institucións competentes dos territorios históricos serán reclamables en vía económico-administrativa ante os órganos competentes dos ditos territorios. Polo contrario, os ditados pola Administración do Estado, calquera que sexa a súa data, serán reclamables ante os órganos competentes do Estado.

Non obstante, o ingreso correspondente atribuirase á Administración que resulte acreedora de acordo coas normas contidas nas regras anteriores.

Sexta. Para os efectos da cualificación de infraccións tributarias, así como das sancións que a estas corresponden en cada caso, terán plena validez e eficacia os antecedentes que sobre o particular consten na Facenda pública estatal con anterioridade á entrada en vigor da concertación dos tributos a que se refire a presente disposición.

Sétima. A entrada en vigor da concertación dos tributos a que se refire a presente disposición transitoria non prexudicará os dereitos adquiridos polos contribuíntes conforme as leis ditadas con anterioridade á dita data.»

«Disposición transitoria décimo segunda.

A exacción polo imposto sobre actividades de xogo que grava as apostas mutuas deportivo-benéficas e as apostas mutuas hípcas estatais corresponderalle á Administración do Estado, mentres a súa comercialización sexa realizada pola Sociedade Estatal de Lotarías e Apostas do Estado, sen prexuízo da compensación financeira que lle corresponda ao País Vasco. A Sociedade Estatal de Lotarías e

Apostas do Estado presentará declaracións informativas anuais das cantidades xogadas imputables ao País Vasco de acordo co artigo 36.dous do concerto económico.»

«Disposición transitoria décimo terceira.

O artigo 34 do concerto económico, na súa redacción orixinal aprobada mediante a Lei 12/2002, do 23 de maio, pola que se aproba o concerto económico entre o Estado e a Comunidade Autónoma do País Vasco, manterase en vigor a partir do 1 de xaneiro de 2013, en relación co imposto sobre as vendas retalistas de determinados hidrocarburos respecto dos exercicios non prescritos.»